

BERGRIVIER MUNISIPALITEIT

VERORDENING INSAKE BEHEER OOR ONDERNEMINGS WAT DRANK AAN DIE PUBLIEK VERKOOP

Kragtens die bepalings van artikel 156 van die Grondwet van die Republiek van Suid-Afrika, 1996, bepaal Bergrivier Munisipaliteit as volg:-

Inhoud

1. Woordoms krywing
2. Doel van verordening en toepassing
3. Handelsdae en -ure vir verkoop en verbruik van drank op gelisensieerde persele
4. Handelsdae en -ure vir verkoop van drank vir verbruik buite gelisensieerde persele
5. Spesiale geleenthede en tydelike lisensies
6. Aanstelling van gemagtigde beamptes
7. Bepaling van tipe gelisensieerde perseel
8. Nakoming en afdwinging
9. Aansoek om verlengde handelsure
10. Beswaar teen hernuwing van lisensies
11. Appèl
12. Oortredings en boetes
13. Herroeping
14. Kort titel en inwerkingtrede

Woordoms krywing

In hierdie verordening, geniet die Engelse teks voorrang in die geval van 'n teenstrydigheid tussen die verskillende tekste, en tensy dit uit die samehang anders blyk, het die volgende woorde die volgende betekenis –

“algemene sakegebied” 'n gebied hoofsaaklik gesoneer as algemene sake of enige ander ekwivalente gebruik, met die doel om ekonomiese aktiwiteit in 'n sakegebied en ontwikkelingskorridor te bevorder, en sluit 'n wye reeks grondgebruike soos sake-, residensiële en gemeenskapsgebruike in;

“die Wet” die Wes-Kaapse Drankwet, 2008 (Wet No. 4 van 2008);

“drank” drank soos gedefinieer in artikel 1 van die Wet;

“gelisensieerde” enige persoon wat gelisensieer is om drank ingevolge die Wet te verkoop en sluit enige gelisensieerde perseel, sakeonderneming, afsetpunt of grondgebruiksaktiwiteit van waar drank verkoop word, in;

“gelisensieerde perseel” 'n plek, grond, gebou of deel van 'n gebou ten opsigte waarvan 'n lisensie om drank te verkoop ingevolge die Wet uitgereik is en sluit 'n voertuig of vaartuig wat hoofsaaklik vir die vervoer van toeriste of passasiers gebruik word in ;

“geslote dae” Kersdag en Goeie Vrydag;

“hotel” ’n eiendom gebruik as tydelike residensiële huisvesting vir verbygaande gaste waar verblyf of maaltye teen vergoeding verskaf word, en sluit in –

- (a) ’n restaurant of restaurante wat deel uitmaak van die hotel;
- (b) konferensie- en vermaakfasiliteite wat ondergeskik is aan en bykomstig is tot die hoofgebruik van die perseel as ’n hotel;
- (c) persele wat gelisensieer is om alkoholiese drank te verkoop vir verbruik op die eiendom,

maar sluit ’n buiteverbruikfasiliteit, instelling vir gaste-akkommodasie, woonhuis of wooneenheid uit;

“instelling vir gaste-akkommodasie” perseel gebruik as tydelike residensiële huisvesting vir, en sluit die voorsiening van maaltye aan, verbygaande gaste teen vergoeding in, en sluit ’n oorblyplek vir rugsakstappers, ’n bed-en-ontbyt-instelling, gastehuis en gasteplaas of lodge, asook fasiliteite vir besigheidsvergaderings, konferensies, byeenkomste of opleidingsessies van inwonende gaste in, maar sluit ’n hotel uit;

“kleinhoewe” ’n gebied hoofsaaklik as landelik gesoneer of enige ander ekwivalente sonering, met die doel om kleiner landelike eiendomme wat vir landboudoeleindes gebruik kan word te akkommodeer;

“landbougebied” ’n gebied hoofsaaklik vir landbou gesoneer of enige ander ekwivalente gebruik, met die doel om landbou aktiwiteit op ’n plaas as ’n belangrike ekonomiese, omgewings- en kulturele hulpbron te bevorder en te beskerm, waar beperkte voorsiening gemaak word vir nie-landbougebruike om aan eienaars ’n geleentheid te bied om die ekonomiese potensiaal van hulle eiendomme te vergroot, sonder om ’n beduidend negatiewe uitwerking op die primêre landbouhulpbron te veroorsaak;

“nywerheidsgebied” ’n gebied hoofsaaklik gesoneer as algemene nywerheid of enige ander ekwivalente gebruik, met die doel om alle vorme van nywerheid te huisves met inbegrip van vervaardiging en verwante verwerking, maar sluit skadelike of gevaarlike risiko-aktiwiteit uit;

“oorlas” enige handeling, versuim of toestand op ’n perseel, openbare plek of straat met inbegrip van enige gebou, struktuur, voertuig of vaartuig wat aanstootlik of gevaarlik is of wat inbreuk maak op die gewone gerief, gemak of vrede van ander persone of wat die veiligheid of gerief van persone nadelig kan beïnvloed;

“Owerheid” die Wes-Kaapse Drankowerheid ingestel ingevolge die Wet;

“residensiële gebied” ’n gebied hoofsaaklik gesoneer as residensiël of algemene residensiële of enige ander ekwivalente gebruik, met die doel om hoofsaaklik enkelgesinwoonhuise in lae- tot mediumdigtheidsbuurte te huisves, asook woongebiede van hoër digtheid en wat insluit beheerde geleenthede vir werkverskaffing van die huis af, addisionele wonings en gemengde gebruiksentwikkeling van lae intensiteit;

“sakeperseel” ’n gebou of eiendom vanwaar sake bedryf word en sluit dit ’n winkel, supermark, restaurant, kantoor, finansiële instelling en geboue vir dergelike gebuie in, maar nie ’n plek van samekoms, plek van vermaak, inrigting, diensstasie, openbare garage, nywerheid, nywerheidskorf,

hinderbedryf, risiko-aktiwiteit, volwassevermaaklikheidsbedryf of drankwinkel in nie;

“sonering” wanneer dit as ‘n selfstandige naamwoord gebruik word, ‘n kategorie van riglyne wat die ontwikkeling van grond reguleer en wat die doel waarvoor die grond gebruik mag word en die grondgebruike of ontwikkelingsbestuurbepalings wat van toepassing is op die gemelde kategorie van riglyne, soos deur die Soneringskema bepaal word, uiteensit;

“soneringskema” die soneringskema of –skemas van toepassing op die gebied en van krag binne die jurisdiksiegebied van die munisipaliteit;

“spesiale geleentheid” ‘n fondsinsamelingsgeleentheid ten bate van ‘n opvoedkundige- of welsynsorganisasie, enige vertoning, sportbyeenkoms, kulturele byeenkoms of kunsuitvoering;

“sport- en gemeenskapsklub” ‘n perseel of ‘n fasiliteit gebruik vir die byeenkom van gemeenskaps- of burgerlike organisasies of verenigings, sportklubs of ander sosiale of ontspanningsklubs wat meestal nie vir wins bedryf word nie en gemeenskapsdiensklubs en gemeenskapsentrums of soortgelyke geriefsfasiliteite kan insluit, maar ‘n nagklub uitsluit;

“Bergrivier Munisipaliteit” die Bergrivier Munisipaliteit gestig ingevolge Art. 12 van die Wet op Plaaslike Regering: Munisipale Strukture Wet, 1998 (Wet 117 van 1998), soos gewysig;

“tydelike lisensie” ‘n tydelike lisensie wat deur die Owerheid uitgereik word aan –

- (a) die houer van ‘n binneverbruiklisensie; of
- (b) in buitengewone omstandighede, aan die houer van ‘n lisensie vir verbruik op en weg van die perseel;

“vermaaklikheidsplek” ‘n plek hoofsaaklik gebruik vir kommersiële vermaak wat moontlik ‘n relatief groot aantal mense kan lok, buite normale sake-ure bedryf word of op ‘n gereelde grondslag musiek speel of joligheid veroorsaak, en sluit in ‘n bioskoop, teater, pretpark, danssaal, gimnasium, totalisator of fasiliteit vir weddenskappe, dobbelsaal, karaoke-kroeg en nagklub;

“vonkelwyn” ‘n bruiswyn verkry deur die gis van druiwe, hetsy deur natuurlike of kunsmatige proses, en wat sjampanje insluit;

“weeksdag” ‘n dag van die week, uitgesonderd Saterdag en Sondag;

“woonbuurt sakegebied” ‘n gebied hoofsaaklik gesoneer as plaaslike sake of gemengde gebruik of enige ander ekwivalente gebruik, met die doel om kommersiële en gemengde gebruiksentwikkeling van lae intensiteit te akkommodeer wat in plaaslike behoeftes aan geriefsgoedere, persoonlike diens of klein sakeondernemings voorsien of as ‘n koppelvlak tussen algemene sakeonderneming, aanliggende residensiële gebied dien;

“wynmakery” sluit in persele of fasiliteite wat gebruik word by die vervaardiging van wyn en sodanige persele of fasiliteite sluit in fasiliteite vir die pars van druiwe en gis en veroudering van wyn, wynverkope en proelokale, vat- en stoorkamers, botteleerlokale, tenklokale, laboratoriums of kantore en ander bykomende of bykomstige fasiliteite verbonde aan die vervaardiging van wyn, wat kan insluit –

- (a) restaurante en ander voedseldienste; of

(b) ondergeskikte handelsfasiliteite vir toergroepe of besoekers.
“wynwinkel” ‘n plek waar verpakte drank verkoop word vir verbruik van die perseel af.

2. Doel van verordening en toepassing

- (1) Om voorsiening te maak vir die beheer van ondernemings wat drank aan die publiek verkoop ten einde ’n veilige en gesonde omgewing in die Bergrivier te verseker; om voorsiening te maak vir dae en ure vir drankhandel deur gelisensieerde ondernemings wat drank aan die publiek verkoop; en om voorsiening te maak vir sake wat daarmee verband hou.
- (2) Hierdie verordening is van toepassing op alle gelisensieerde persele binne die jurisdiksie van die munisipaliteit.

3. Handelsdae en -ure vir verkoop en verbruik van drank op gelisensieerde persele

- (1) ’n Gelisensieerde mag drank vir verbruik op die gelisensieerde perseel op die onderstaande dae en ure verkoop –
 - (a) op enige dag van die week; en
 - (b) gedurende die handelsure soos in die Bylae uiteengesit
- (2) Ondanks subartikel (1), mag ’n hotel of instelling vir gaste-akkommodasie wat gelisensieer is om drank te verkoop, ’n kamerdiensfasiliteit te enige tyd van die dag aanbied.
- (3) Ondanks die bepalings van hierdie verordening, mag ’n gelisensieerde soos bedoel in subartikel (1), vonkelwyn bedien –
 - (a) van 08:00 vir sewe dae per week;
 - (b) as deel van ’n maaltyd; en
 - (c) aan gaste wat deel uitmaak van ’n georganiseerde funksie waar toegang beheer word.

4. Handelsdae en -ure vir verkoop van drank vir verbruik buite gelisensieerde persele

- (1) ’n Gelisensieerde, met die uitsondering van wynmakerye en wynwinkels, mag drank vir verbruik buite die gelisensieerde perseel verkoop vanaf Maandag tot Saterdag vanaf 09h00 tot 20h00, Sondag 09:00 tot 14:00, maar nie op geslote dae nie.
- (2) Gelisensieerde wynmakerye en wynwinkels mag drank vir verbruik buite die perseel op die onderstaande dae en ure verkoop –
 - (a) vanaf Maandag tot Saterdag vanaf 09:00 tot 20:00; en
 - (b) op Sondag vanaf 09:00 tot 17:00,maar nie op geslote dae nie.

5. Spesiale geleenthede en tydelike lisensies

Waar die Owerheid ’n aansoek om ’n spesiale geleentheidslisensie of ’n tydelike lisensie ingevolge artikel 48 van die Wet na die munisipaliteit verwys vir kommentaar of aanbeveling, mag die munisipaliteit ’n afwyking van die handelsure soos bepaal in die Bylae tot hierdie verordening, aanbeveel.

6. Aanstelling van gemagtigde beamptes

Die munisipaliteit mag enige beampte aanstel om die bepalings van hierdie verordening te implementeer en af te dwing.

7. Bepaling van tipe gelisensieerde perseel

Waar die definisie of kategorie van enige gelisensieerde perseeltipe, soos weerspieël in items 1 tot 6 van die Bylae tot hierdie verordening, onseker is of moeilik bepaal kan word, mag 'n gemagtigde beampte, soos bedoel in artikel 6, die definisie daarvan bepaal ten einde die handelsure wat daarop van toepassing is, te bepaal.

8. Afdwinging en nakoming

(1) 'n Gemagtigde beampte mag, vir die doeleindes om nakoming te verseker van die handelsure soos bepaal in hierdie verordening, op redelike tye enige gelisensieerde perseel of enige perseel ten opsigte waarvan 'n aansoek ingevolge hierdie verordening ingedien is, betree.

(2) Wanneer die gemagtigde beampte 'n perseel ingevolge hierdie artikel binnegaan, moet hy of sy hom- of haarself aan die persoon in beheer van die perseel identifiseer.

(3) 'n Gemagtigde beampte mag 'n voldoeningskennisgewing aan die gelisensieerde of enige persoon in beheer van 'n gelisensieerde perseel bedien en 'n beroep op sodanige persoon doen om die bepalings van hierdie verordening na te kom.

(4) 'n Voldoeningskennisgewing moet die volgende stipuleer –

- (a) die bepalings van die verordening wat oortree word;
- (b) die handeling of versuim wat op nie-nakoming neerkom;
- (c) die stappe wat geneem moet word om die bepalings na te kom;
- (d) die datum of tyd waarop die bepalings nagekom moet word, waar van toepassing; en
- (e) die moontlike gevolge van nie-nakoming.

9. Aansoek om verlengde handelsure

(1) Ondanks die bepalings van artikel 3, mag die houer van 'n binneverbruiklisensie teen betaling van die voorgeskrewe fooi by die munisipaliteit aansoek doen om op 'n weksdag wat 'n publieke vakansiedag voorafgaan, uitgesonderd geslote dae, handel te dryf gedurende die ure soos neergelê in die Bylae vir 'n Vrydag en 'n Saterdag.

(2) Die bepalings van subartikel (1) is nie van toepassing op houers van binneverbruik lisensies op persele in kategorieë 1 en 2 van die Bylae nie;

(3) Aansoeke moet op die voorgeskrewe wyse ingedien word en moet ten minste 14 dae voor die datum waarop verlengde ure benodig word, ingedien word. Laat aansoeke sal nie oorweeg word nie.

(4) Hoogstens drie aansoeke om verlengde handelsure sal per perseel per kalenderjaar sal oorweeg word.

(5) Geen aansoek ingevolge subartikel (1) sal oorweeg of geprosesseer word gedurende die tydperk 1 Desember tot 15 Januarie van die volgende jaar nie.

(6) Geen regte word verkry deur die gelisensieerde wat aansoek gedoen het om verlengde handelsure alvorens skriftelike goedkeuring deur hom of haar ontvang is nie.

(7) Die munisipaliteit moet tydens oorweging van 'n aansoek vir verlengde handelsure oorweging skenk aan tersaaklike faktore wat die volgende mag insluit –

- (a) die geldigheid van die dranklisensie;
- (b) waar van toepassing, die geldigheid van 'n besigheidslisensie wat ingevolge die Wet op Besighede van 1991 (Wet 71 van 1991) uitgereik is;
- (c) liggingskategorie volgens die Bylae;
- (d) vorige rekords van klagtes wat ondersoek en bevestig is ten opsigte van die twaalf maande wat 'n aansoek vir verlenging voorafgaan;
- (e) die nabyheid van die gelisensieerde perseel aan omliggende residensieel-gesoneerde areas, kulturele-, godsdienstige- en opvoedkundige fasiliteite;
- (f) die potensiële impak op die omliggende omgewing;
- (g) of dit in die openbare belang is om 'n verlenging van handelsure goed te keur;
- (h) 'n motivering van die aansoeker wat aandui –
 - (i) die moontlike risiko's vir die omliggende gemeenskap en die veroorsaking van geraas en ander oorlaste;
 - (ii) maatreëls om moontlike risiko's en oorlaste te beheer of te verminder; en
 - (iii) moontlike voordele wat verlengde handelsure vir die omliggende gemeenskap mag inhou;

(8) By oorweging van die aansoek bedoel in subartikel (1) mag die munisipaliteit insette verkry vanaf –

- (a) die betrokke wykskomitee;
- (b) omliggende inwoners wat geaffekteer mag word;
- (c) die plaaslike Gemeenskapspolisiëringsforum;
- (d) die aangewese drankoffisier van die S.A. Polisiediens; en
- (e) enige gemeenskapsorganisasie soos kerkgroepe, belastingbetalers-, of sakeforums.

(9) Die munisipaliteit mag 'n aansoek vir verlengde handelsure goedkeur onderhewig aan voorwaardes en die grondslag van en beweegrede vir alle besluitneming moet genotuleer word.

10. Beswaar teen hernuwing van lisensies

(1) Die munisipaliteit, of enige van die instansies of persone vermeld in artikel 9(9), sal die reg hê om verhoër te rig teen die outomatiese hernuwing van 'n dranklisensie binne sy jurisdiksiegebied –

- (a) waar die gelisensieerde perseel nie gesoneer is vir sodanige gebruik ingevolge die munisipaliteit se soneringskema regulasies nie; of
- (b) waar die gelisensieerde perseel, sedert die laaste hernuwing van sodanige lisensie, die onderwerp was van 'n klagte of klagtes wat deur die munisipaliteit ontvang is.

(2) Die munisipale bestuurder moet die verhoër voor 31 Julie van die jaar voor die jaar ten opsigte waarvan die hernuwing van toepassing sal wees, skriftelik by die Owerheid indien.

11. Appèl

'n Persoon of regsentiteit wie se regte deur 'n besluit van die munisipaliteit ingevolge 'n gedelegeerde gesag geraak word, mag appèl aanteken teen daardie besluit deur binne 21 dae van die datum van kennisgewing van die besluit skriftelik aan die munisipale bestuurder kennis te gee van die appèl en die redes daarvoor ingevolge artikel 62 van die Wet op Plaaslike Regering: Munisipale Stelsels, Wet 32 van 2000.

12. Oortredings en boetes

- (1) 'n Gelisensieerde wat artikel 3 of 4 van hierdie verordening oortree, of versuim om te voldoen aan 'n kennisgewing uitgereik ingevolge artikel 8, pleeg 'n misdryf.
- (2) 'n Persoon wat 'n gemagtigde beampte in die uitvoering van pligte verhinder of belemmer, pleeg 'n misdryf.
- (3) Enige persoon wat die bepalings van hierdie verordening oortree, sal by skuldigbevinding blootgestel wees aan –
 - (a) 'n boete of gevangenisstraf, of aan òf sodanige boete òf gevangenisstraf, of aan sodanige boete sowel as sodanige gevangenisstraf;
 - (b) in die geval van 'n voortgaande oortreding, aan 'n addisionele boete of aan 'n addisionele tydperk van gevangenisstraf of aan sodanige addisionele gevangenisstraf sonder die opsie van 'n boete, of aan sodanige addisionele boete en gevangenisstraf vir elke dag waarop sodanige oortreding voortgaan; en
 - (c) 'n verdere bedrag gelyk aan enige kostes en uitgawes wat deur die munisipaliteit aangegaan is as gevolg van sodanige oortreding of versuim.

13. Herroeping

Die Verordening op Drankhandelsdae en -ure van Bergrivier Munisipaliteit soos gepubliseer in Provinsiale Koerant No. 7118 op 12 April 2013 word hiermee herroep.

15. Kort titel en inwerkingtrede

Hierdie Verordening word genoem die Bergrivier Munisipaliteit se Verordening insake Beheer oor Ondernemings wat Drank aan die Publiek verkoop en neem 'n aanvang op die datum van publikasie hiervan in die Provinsiale Koerant.

DRAFT

BYLAE

Handelsure vir verbruik van drank op gelisensieerde persele

Liggingskategorie & tipe gelisensieerde perseel	Maksimum toegelate handelsure
1. Residensiële gebied	
Instelling vir gaste-akkommodasie	Maandag – Donderdag : 09h00 – 23h00
Sakeperseel	
Sport- en gemeenskapsklub met die uitsondering van spesiale geleenthede	Vrydag – Saterdag : 09h00 – 24h00 Sondag : 11h00 – 23h00
2. Woonbuurtsakegebied met inbegrip van gemengde gebruiksaareas	
Instelling vir gaste-akkommodasie	09h00 – 24h00
Sakeperseel	
Vermaaklikheidsplek	
Sport- en gemeenskapsklub met die uitsondering van spesiale geleenthede	
3. Algemene sakegebied	
Instelling vir gaste-akkommodasie	Maandag – Donderdag : 09h00 - 24h00
Sakeperseel	
Vermaaklikheidsplek	Vrydag – Saterdag : 09h00 - 02h00 volgende dag
Sport en gemeenskapsklub met die uitsondering van spesiale geleenthede	
Hotel	Sondag : 09h00 – 24h00
4. Nywerheidsgebied	
Sakeperseel	Maandag – Donderdag : 09h00 - 24h00
Vermaaklikheidsplek	
Sport en gemeenskapsklub met die uitsondering van spesiale geleenthede	Vrydag – Saterdag : 09h00 - 02h00 volgende dag Sondag : 09h00 – 24h00
5. Landbougebied / Kleinhoewes	
Instelling vir gaste-akkommodasie	09h00 – 02h00 volgende dag
Vermaaklikheidsplek	
Sport- en gemeenskapsklub met die uitsondering van spesiale geleenthede	
Wynmakery	
Hotel	
6. Ander ad hoc-liggings	
Voertuie of mobiele ondernemings gebruik vir toeriste of vermaak of	09h00 – 24h00

ontspanningsdoeleindes ooreenkomstig die definisie van 'perseel' in artikel 1 van die Wet, tensy enige ander Verordening van die Bergrivier Munisipaliteit anders bepaal	
Spesiale geleenthede of tydelike lisensies	Soos bepaal ingevolge die goedkeuring uitgereik deur die Owerheid in terme van artikel 48 van die Wet na oorlegpleging met die munisipaliteit

DRAFT